

करम खीरी अरा करम महबा

करम रा:गे नु डण्डी पाड़नर -

करम-करम बाचकी पेलो कोय ।।2।।

करम निंगहय चा:ली नु बरचा, रे ।।2।।

असार, सावन खरा दुलार केरा ।।2।।

भादो नु करम निंगहय बरचा, रे ।।2।।

बअनर - हुल्लो परिया नु ओन्टा कुँडुख बे:लस ही रा:जी नु ओंगओल अनभनियौँ रा:जी कीड़ा मंज्जा। चेंप-झड़ी मल पुईका ती खितीपुती मल मना हेल्लरा। तूसा-झरिया, खाड़-खोसरा, कूबी-पोखारी उरमी खाया लगिया। मन्न-मास ही खंजपा हूँ नठारआ हेल्लरा। ओना-मोखा गे मल खरखरना ती टोडंग-परता ता अड़खा-चे:खेल अरा बोकला गुट्ठीन मो:खर, आलर एकअम बेसे उल्ला खेपआ लगियर। चान-चान, चेंप-झड़ी मल मंज्जका ती कुँडुख बे:लस गे रा:जी चलाबअना अफईत मना हेल्लरा। बे:लस ही खद्द-खर्रा मल रहचका चड्डे आस हेन्दवारकम रआ लगियस पँहेस रा:जी की:ड़ा बे:लासिन अउर बगे ससईत चिच्चा। बे:लस, बखड़े नु अखआ-बल्ला उरमी मदहे ही बईध- मती, ओहरा-बिनती अरा पुजा-धजा ननताच ईरयर, पँहेस चेंप मल पोस्सा अरा खद्द खर्रर हूँ मल मंज्जर। एन्नेम नननुम उल्ला कट्टनुम का:ला लगिया। उन्दुल बे:लस, बेलखा ता आ:लर ही ससईत अरा दुक्खेन ए:रर सोगगे ती तंगहय बखड़े छमहे ता खाड़ गण्डा गुसता करम मन्न ए:ख नु ओक्कर बेलखा अरा खद्द-खर्रा ही चिता-बुता नननुम खन्न ए:खा लगियस। आ बारीम करम मन्न गुसन ओन्टे अनबूझ ले अलहन (अलौकिक घटना) मंज्जा। करम मन्न, ठनका खतरना बेसे जिरजोर ले बिलिचया अरा चाल खक्खरा - "अम्बा सोगगे मना बे:लायो अरा डिड्ढ नना। अक्कु निंगहय करम-कपड़े किर्रो।" एन्ने बअनुम ओरोत अनथन दव आलस (दव ननु आ:लो) ही छाव नु ओन्टे पचगीस बरचस अरा बे:लस सिन आनियस - "ई करम मन्न ही मून्द गोटंग डा:ड़न होअके दरा अखड़ा मजही नु गड़अर की पुजा-धजा ननके दरा नन्ना उल्ला खाड़ नु बोहा बअके। एन्ने ननोर होले निमहँय बेलखा नु चेंप-झड़ी बरओ, खिती-पुती मनो, बेलखा-रा:जी की:ड़ा ती परपन्द मनो अरा ओरमर ही खद्द-खर्रा कोड़े रओर दरा निमहँय करम-कपड़े किर्रो।" एन्ने बअर आ पचगिस असते की छन्द मंज्जस केरस।

जोक्क गहड़ी हया-दंदा मंज्जका खो:खा, बे:लस बखड़े किर्रयस दरा ओरमर गने गुजाप नंज्जस अरा आ अनथन दव पचगिस गहि कत्था आइनका बेसेम नना गे टीप उईता:चस अरा बेलखा नु डहुड़ा कुद्दतारा दरा टीप धरचका उल्ला ओरमर उबसियर की पुतबीरी आ करम मन्न गही मून्द गोटंग डा:ड़न मइन ती ओन्दरर की अखड़ा मजही गड़अर पुजा-धजा नंज्जर अरा रिज्ज ती बे:चा ओ:रे नंज्जर। बअनर पुजा-नेग मुंजुरते-मुंजुरतेम घटा-घुमईर बदाली बरचा दरा मुसुरकुट चेंप पोस्सा। आ:लर रिज्ज ती अनभनियौँ बिच्चयर अरा नन्ना उल्ला पइरी निन्दका खाड़ नु करम डाड़न बोहाबा:चर।

केरमे-केरमे रा:जी किर्रया अरा आ कुँडुख बे:लस ही बेलखा दव कुना चलरआ हेल्लरा। अउलता करम, बे:ल खोता ता करम बअनुम रा:जीयर गे रा:जी करम बाता:रा। करम पुजा-धजा मंज्जका ओन्द चान खो:खा करम उल्ला बे:लस ही ँँडपा नू ँँड जना कुक्को खद्द कुन्दरर। बे:लस, कोंहस ही ना:मे करमा अरा सन्नीस गे ना:मे धरमा उईयस। एन्नेम रा:जी चलरनुम केरा, बेड़ा कट्टनु केरा, आ:लर बढरतेम केरर अरा रा:जी करम मन्नुम केरा। बेड़ा सिरे बे:लस ही अउरेम खद्दर मंज्जर। ई करमा-धरमा गर साय भईयो मंज्जर अरा ओरमर ती सन्नी ओन्टे बहीन मंज्जा। करम गड़ना ओरे मनना उल्ला भादो चन्ददो ही दोय ओन्दता उल्ला रहचा केन्धेल। अउलता उल्लानुम पुरखर गही तिगंगा बेसेम रा:जी करम मना बअनुम बरतारआ लगी।

बअनर – आ बेल बखड़े ता करमा-धरमस तमहय भईयो अरा सन्नी बहीन गने दव कुना परदा हेल्लरर। ओरमर ती सन्नी तंगड़ी, तमहंय सन्नी भइयोस गने जमा खद्द (जुड़वां) रहचा खने अदिन मया तुरु होरमर जउनी बअर पिंज्जा लगियर। बेड़ा सिरि ओरमा भईयोर गही बेंज्जा मंज्जका खोःखा एड़पा नु सये भइयोर गही सये झना खई बगर अरा ओरोत तंगड़ी, दव कुना रअआ हेल्लरर। तंगड़ी गही बेंज्जा अवंदा गूटी मल मंज्जकी रहचा। अयंग-बंग मुंजुरका खोःखा कौंहा भईयो करमस एड़पा चलाबआ लगियस। आस ओरमा भईयोर गही मदईत ती एड़पन दव कुना चलबअआ लगियस। आर गही परिदका बेड़ा नुम अउर आंगओल अनभनियाँ राःजी कीड़ा मंज्जा। चेंप-झडी अकय चान ती दव कुना मल पुईकी रहचा। राःजी कीःड़ा तुरु आलर इलहो-बिलहो मना हेल्लरर। राःजी कीःड़ा संगे रोःगे-बलय ती आःलर छितिछान मना लगियर। अड्डो-मेक्खो, जिया-जंउत, मन्न-मास, उरमी गे अकय ससईत मना लगिया। ओरमर धरमे सिन गोहरारर, पूजा-धजा नंज्जर पंहेस एन्दरा हूं डहरे मल एत्थरा। पद्दा ता आःलर नना-ओना गे अजगो-इजगो काःला हेल्लरर। करमस गही एड़पा नु हूं खुरजी नटठरा केरा अरा कीड़ा सारतारआ हेल्लरा। एड़पा नु खुरजी मलका अरा रोःगे-बलय, पद्दा-खेप्पा नु उज्जना मसकिल मना लगिया। एन्नेन एःरर करमस तेलंगा (तुडुख) राजी, मलंग लदआ काःला गे सपड़ारस। एड़पा नु गुजाप मंज्जा का ने-ने एड़पा नु रअओर अरा ने-ने मलंग लदआ काःलोर? कौंहा भईयोसिन एड़पा ती बहरी काःनन मेनर तंगड़ी गे अकय सोगगे लगिया अरा आद हूं तंग ददा बगर गने मलंग लदआ काला गे सपड़ाःरआ हेल्लरा। कौंहा भईयोस तंगड़िन बरजाचस अरा धिरजा चिच्चस का –“चेंप खतरआ-खतरआ गे ओरमा भईयो बगर जुनजुना एड़पा किरोर। एन्ने गछरका खोःखा, भईयो बगर तमहंय आःली बगारिन, जऊनिन एःरा गे जिमा चिच्चर दरा मलंग लदआ गे एड़पा ती उरखर।

पोस्सा। आःलर रिज्ज ती अनभनियाँ बिच्चयर अरा नन्ना उल्ला पइरी निन्दका खाड़ नु करम डाड़न बोहाबाःचर।

केरमे-केरमे राःजी किरिया अरा आ कुँडुख बेःलस ही बेलखा दव कुना चलरआ हेल्लरा। अउलता करम, बेःल खोता ता करम बअनुम राःजीयर गे राःजी करम बाताःरा। करम पुजा-धजा मंज्जका ओन्द चान खोःखा करम उल्ला बेःलस ही एँडपा नू एँड झना कुक्को खद्द कुन्दरर। बेःलस, कौंस ही नाःमे करमा अरा सन्नीस गे नाःमे धरमा उईयस। एन्नेम राःजी चलरनुम केरा, बेड़ा कट्टनु केरा, आःलर बढरतेम केरर अरा राःजी करम मनुम केरा। बेड़ा सिरि बेःलस ही अउरेम खद्दर मंज्जर। ई करमा-धरमा गर साय भईयो मंज्जर अरा ओरमर ती सन्नी ओन्टे बहीन मंज्जा। करम गड़ना ओरे मनना उल्ला भादो चन्दो ही दोय ओन्दता उल्ला रहचा केन्धेल। अउलता उल्लानुम पुरखर गही तिगका बेसेम राःजी करम मना बअनुम बरतारआ लगी।

बअनर – आ बेल बखड़े ता करमा-धरमस तमहय भईयो अरा सन्नी बहीन गने दव कुना परदा हेल्लरर। ओरमर ती सन्नी तंगड़ी, तमहंय सन्नी भइयोस गने जमा खद्द (जुड़वां) रहचा खने अदिन मया तुरु होरमर जउनी बअर पिंज्जा लगियर। बेड़ा सिरि ओरमा भईयोर गही बेंज्जा मंज्जका खोःखा एड़पा नु सये भइयोर गही सये झना खई बगर अरा ओरोत तंगड़ी, दव कुना रअआ हेल्लरर। तंगड़ी गही बेंज्जा अवंदा गूटी मल मंज्जकी रहचा। अयंग-बंग मुंजुरका खोःखा कौंहा भईयो करमस एड़पा चलाबआ लगियस। आस ओरमा भईयोर गही मदईत ती एड़पन दव कुना चलबअआ लगियस। आर गही परिदका बेड़ा नुम अउर आंगओल अनभनियाँ राःजी कीड़ा मंज्जा। चेंप-झडी अकय चान ती दव कुना मल पुईकी रहचा। राःजी कीःड़ा तुरु आलर इलहो-बिलहो मना हेल्लरर। राःजी कीःड़ा संगे रोःगे-बलय ती आःलर छितिछान मना लगियर। अड्डो-मेक्खो, जिया-जंउत, मन्न-मास, उरमी गे अकय ससईत मना लगिया। ओरमर धरमे सिन गोहरारर, पूजा-धजा नंज्जर पंहेस एन्दरा हूं डहरे मल एत्थरा। पद्दा ता आःलर नना-ओना गे अजगो-इजगो काःला हेल्लरर। करमस गही एड़पा नु हूं खुरजी नटठरा केरा

अरा कीड़ा सारतारआ हेल्लरा। एड़पा नु खुरजी मलका अरा रोःगे-बलय, पद्दा-खेप्पा नु उज्जना मसकिल मना लगिया। एन्नेन एःरर करमस तेलंगा (तुडुख) राजी, मलंग लदआ काःला गे सपडारस। एड़पा नु गुजाप मंज्जा का ने-ने एड़पा नु रअओर अरा ने-ने मलंग लदआ काःलोर? कौंहा भईयोसिन एड़पा ती बहरी काःनन मेनर तंगड़ी गे अकय सोग्गे लगिया अरा आद हूँ तंग ददा बगर गने मलंग लदआ काला गे सपडारआ हेल्लरा। कौंहा भईयोस तंगडिन बरजाचस अरा धिरजा चिच्चस का –“चेंप खतरआ-खतरआ गे ओरमा भईयो बगर जुनजुना एड़पा किर्रोर। एन्ने गछरका खोःखा, भईयो बगर तमहँय आःली बगारिन, जऊनिन एःरा गे जिमा चिच्चर दरा मलंग लदआ गे एड़पा ती उरखर।

डहरे एःकते-एःकते आर गे पइरी ती लोहाड़ी अरा लोहाड़ी ती संदही मना हेल्लरा। लोहाड़ी अरा खुड़ती ओना गे एड़पा ती होच्चका अड़खा-चेःखेल अरा अलखडन मोःखना दरा झरिया ता अम्म ओनर उल्ला खेपआ हेल्लरर। एन्नेम कालते-कालते आर ढेर गेच्छा राःजी उरखर केरर, अन्तिले उन्दुल पुतबारी गुजाप नंज्जर का – नाम अक्कु सायो भईयोत सायो कौंःडा तरा मलंग लदआ गे काःलोत, तसले चेंप खतरका ती इसता परता करगा हेददे जुमुरओत अरा एड़पा किर्रोर। एन्ने भंगरारका खोःखा ओरमा भईयोर तंगआ-तंगआ फरियाचका डहरे तरा उरखर।

बेड़ा सिर्रे ओरमर तमहँय नलख नु लइक्का रहचर। कौंहा भईयो करमस चन्दवा कंक (चन्दन लकड़ी) गही चन्दवा कमना नु पंखराज रहचस। अवंगे आस गही खुरजी उल्ला गइनका बढरआ हेल्लरा। बग्गे खुरजी अरजाअना चिता नु ओरमा भईयोर एड़पा किर्रनन मोधरर केरर। चेंप खतरा, खाड़-खोसरा निन्दया बइत्तया, पंहेस सायो भईयोर गे होस मल बरचा का आरिन चाँडे एड़पा किर्रना रअई। इजगो एड़पा नु तंगड़ी अरा सायो गुतनिर हया-दंदा मना हेल्लरर का सायो भईयोर एन्देर गे एड़पा मल किर्रा लगनर? जऊनी भभनाचा – ददा बगर गा गछरका रहचर का चेंप खतरका ती एड़पा किर्रा गे, पंहेस अक्कु गूठी मल किर्रा लगनर। डहरे बाट नु इन्दिरईम अलहन (घटना) मंज्जा का एन्देर ! का खाड़ बोहाबाःचा ! का लकड़ा मेढो होच्चा ! जे इवन्दा उल्ला नु हूँ एंग ददा बगर मल किर्रा लगनर। एन्ने घोखअर आद मुरुख चींखी। अदिन एःरर तंग नासगो बगर हूँ एलचा हेल्लर का माःनीम एन्दिईम अलहन मंज्जा होले अफाइत मनो कालो। जऊनी तंग भईयो बगर गही सोग्गे ती अम्म मण्डिन अम्बिया चिच्चा। अदिन एःरर सायो गुतनिर गे मसकिल मंज्जा केरा का जऊनी इन्दिरईम मंज्जा होले आर जऊनी तंग भईयो बगर हेददे एका बेसे मूँही एःदओर। एन्ने-एन्ने नुम आसारी चन्दो कट्टिया तसले सावन चन्दो हूँ कट्टा लगिया। इजगो जऊनी उल्ला माखा धरमेस ती गोहरारआ लगिया का –“अना धरमे, एंगहय ओरमा कौंहा ददा बगारिन कोड़े-कोड़ेम एड़पा तईया चिअआ, मला होले एःन एका बेसे रओन।” जऊनी गही गोहरारन धरमेस मंज्जस केन्धल, का अन्ति धरमेस गही छया-भया नंज्जका अन्ति। जऊनी, उन्दुल अड़ती बाःरी पद्दा छमहे ता खाड़ गण्डा गुसता करम मन्न एःख नु ओक्कर तंग भईयो बगर गही सोग्गे ती चींःखा-ओलखा लगिया। आ बारीम करम मन्न ती ओन्टे अनबूझ ले कत्था मंज्जा। करम मन्न ठनका खतरना बेसे बिलिचया दरा चाल खक्खरा – “अम्बय चींखय बिटी, डिड्ड उईयय। निंग भईयो बगर चाँःडेम किर्रोर। “एन्ने बअनुम ओरोत पचगी आलस ही छाव नु ओरतोस बरचस अरा जऊनीन धिरजा चिच्चस। अदि खोःखा जऊनिन आनियस – ई मन्न दुढरी ता बिहनिन हो’अय दरा कलय बिटी, ई बिहनिन बउगी नु ईदके दरा एड़पा उला उइके अरा सायता उल्ला करम उबसअर की पुजा-धजा ननके। पुजा नु ई बिरही पूँपन अरगाअके दरा नना उल्ला खाड़ नु बोहा बअके। एन्ने ननोय होले, निंग भईयोर गही मूँहीन नीन चाँडे एःरा ओंगोय।” अन्तिले आ पचगिस असते छन्द मंज्जस केरस। अदी खोःखा आद असता बिहनिन होअर

एड़पा किर्रया दरा तंग नाःसगो बगारिन तिंंगया। अन्तिले आ अनथन दव पचगिस गही कत्था आइनका लेखेम नना गे तंग नासगो बगर धिरजा चिच्चर दरा आ तिंंगका बेसे नन्तआ ओरे नंज्जर।

अन्तिले बिहनिद इदतारा दरा एडपा उला उइतारा। इदी खोखा ओरमर तंग जादा गने सायता उल्लन असपँयडा एःरा हेल्लरर। इजगो धरमेस गही दोवा तुरु सायो भईयोर गे लूर किर्रा हेल्लरा – का आरिन चाँडे एडपा किर्रना रअई। अन्तिले आर चाँडे-चाँडे तमहँय ढिबा खुरजिन मुसिगयर अरा खडु अड्डो नु लदचर की गछरका अड्डा गुसन जुम्मरर की एडपा किर्रा हेल्लरर। करमस ओरमर ती बरगे ढिबा अरजाचका रहचस अरा ढिबा गही दप्प तुरु जहडी आल मंज्जका रहचस। आस तंग भईयो बगारिन हूँ मल बदआ हेल्लरस। ई लेखे ओक्कते-इजते आर पद्दा गुसता खाड़ गण्डा गुसन अँडिसयर। असन अँडसर की करमस तरनारनुम ओरमर ती सन्नी भईयोसिन आनियस की एडपा तईयस – “कला हो निंग नासगो बगारिन बअके का – ददा बगर ढेर बग्गे ढिबा-खुरजी अरजाःचर की बरआ लगनर, से आःरिन खाड़ गण्डा गुसन परिछआ गे गुचा।”

इजगो जऊनी अरा तंग नाःसगो बगर सायता उल्ला करम उबसियर अरा करम पुजा नंज्जर दरा रिज्ज ती नला तोःका लगियर। जऊनी आ पूंपन ओरमर गे खट्टिया अरा ओरमर अदिन मइन ती झोकचर अरा मेःझरर। एका पूंप जौ बिहनी ती कुन्दुरकी रहचा अरा जऊनी ही खेक्खा ती परिदया खने, आ पूंप “जवा पूंप” बाताःरा। अन्ने नलना तोःकना बेडा नुम, सन्नी भईयोस एडपा अँडिसयस, पहें ओरमर रिज्ज ती रितयारकर गुसन करमा भईयोस गही कत्थन तेंगा गे मोधरस केरस। पहें सन्नी भईयोस, तंगडी गही चिच्चका जवा पूंपन मया ती झोकचस दरा रिज्ज ती बेचा हेल्लरस। इजगो सन्नी भईयोसिन मल बरना एःरर सोयता, पानता, नाखता अरा मून्दता भईयो बगर पाःली-पाःली एडपा बरचर पँहेस ओरमर रिज्ज ती उंक्खयर केरर। इदी खोःखा करमस किबिरनुम तंग आली बगारिन मेःखा गे धरमासिन धिराबअनुम तईयस। मुन्दा आस हूँ एडपा अँडसर की मोःधरस केरस। आस तंगडी गही चिच्चका जवा पूंपन दव कुना झोकचस अरा संगे-संगे बेःचा हेल्लरस। मुंज्जा नु नेःकन हूँ मल किर्रना एःरर करमस ताःनिम केबेरेते एडपा अँडिसयस। खने एःरदस का ओरमर पद्दा बखडे नु करम गही चऊगुडदी उधमध बेच्चा लगनर। कौंहा भईयोसिन एःरर जऊनी बोंगते केरा, ओलगिया अरा जवा पूंप चिच्चा। पँहेस ढिबा गही दप्प ती उमतारका करमस तंगडी गही खेक्खा ता जवा पूंपन थपडाचस की हिबिडयस अरा कैर ती करम डाःडन चड्डस दरा गेच्छम हिबिडयस चिच्चस। आ बारिम बजर खत्तरा अरा धरमे दोवा ती आ करम डाःडा उढियारनुम खाड़ नू खत्तरा। अदि खोःखा धर्मेस गही छया-भया का अन्ती एन्देर – ओरमर करमस गने खाड़ गण्डा गुसन केरर खने एःरनर का – करमस ही ढिबा-खुरजी लदचका खडु अड्डो गुट्टिन बजर लवचकी रहचा अरा उरमी ढिबा चिन्द मंज्जकी रअई। अबडन एःरर करमस हया-दन्दा मननुम चींखा-ओलखा हेल्लरस।

इदी खोःखा करमस एडपा किर्रयस अरा हिबिडका करम डाःडन बिदद ईरयस। पहें आ करम डाःडा नीःदका खाःड नू खत्तरा दरा टोपोल-टोपोल मन्नुम किय्या तरा चला केरा। अन्तिले करमस, तंगहय करम-कपडे खोःटोरका संगे एकअम बेसे ओक्का-इजआ हेल्लरस, पहें अउला तिम आस गही उरमी नलख मलदव मना हेल्लरा। आस कत्था-कत्था नुम खिझारआ अरा कैरारआ हेल्लरस। अन्ने-अन्ने नुम ओरमा भईयोर जुदा मंज्जर केरर। करमस उल्ला गइनका खुरजी मलका अरा गुडबा (गरीब) मना हेल्लरस। ओन्द चान खोःखा उन्दुल सन्नी भईयो धरमस गही रोवा (रोपा) इदना ही बेडा बरचा। ओरमा भईयोर रोवा मदईत केरर अरा एडपा किर्रर की मदईत ओण्डर-मोक्खर, पँहेस करमस मदईत ओना मल केरस। करमा तंग आली रोवा इदआ केरा तसले किर्रया की मदईत मण्डी ओण्डा तेकर एडपा किर्रया। करमस जहडी जिया ती मण्डी मल ओण्डस दरा नीःदी कूल रईह केरस। माःखा बाःरी कूल कीडा तुरु करमस अऊरिम खिंसारदस अरा हिसिंगा-पटंगा मनदस, अन्तिले कैरारनुम रोवा खल्ल केरस की तंग आःली गही इददका रोवन चडआ-चडआ हेबडा हेल्लरस, मुन्दा धरमेस गही छया-भया, चडरका रोवा तान-तानीम इदिरआ हेल्लरा। अदिन एःरर कैरारनुम चाँडे-चाँडे चडदस की हेबेडदस, पँहेस रोवा हूँ अदी ती बग्गे चाँःडे इदिरनुम काःली। अबडन एःरर इलिचयस की बोंगा

हेल्लरस। आ बारीम ओन्टा सड़ा मेन्दरा अरा ओरोत अनथन दव पचगी आलस हेददे बरचस की बाःचस – “निंगहय करम–कपड़े (किसमईत) खोट्टरा हो करमा। नीन करम देःवन रूसी नंज्जकय अरा चड्डकय की हिबिडकय। अक्कु एका गूटी नीन करम देःवन मल मनाबओय आ गूटी निंगहय करम–कपड़े मल किर्रो। एन्ने बअर आ देव पचगिस छन्द मंज्जस केरस। आ देव (दव ननु) पचगिस गही कत्थन मेनर करमस गे होस बरचा। आस पछतारआ हेल्लरस अरा करम देःवन बेददागे उरखस? एड़पा ती उरूखका खोःखा कूल–कीड़ा लङ्गका ती एड़पा ती होच्चका अलखड़ा गुट्ठिन मोःखर दरा झरिया ता अम्मन ओनर मुन्दहारे काःला हेल्लरस। एन्ने मननुम आस ढेर गेच्छा राःजी उरखस केरस।

कालते–कालते करमस गे अकय कीड़ा लगिया। आस डहरे नु डोम्बारी पंज्जकन ईरयस की मोखा गे मन्न मइय्यौ अरिगयस पँहेस डोम्बारिन मोखा पोल्लस – एन्देरे गे का उरमी डोम्बारी नु पोचगो मंज्जकी रहचा। अदी खोःखा आस मुन्धभारे काला हेल्लरस। डहरे नु आस गे ओण्टा पोखारी खक्खरा। असन आस अम्म ओना केरस पँहेस अम्म ओना पोल्लस – एन्देरेगे का अम्म खेंःसो मंज्जकी रहचा। असते की आस काःला हेल्लरस। डहरे नु ओन्टे पलखंज्जा इद’उस खक्खरस, पँहेस आस गुसन हूँ पलखंज्जा मल खक्खरा – एन्देरेगे का आस गही पलखंज्जा नु पोका लगकी रहचा। असते की आस काःला हेल्लरस। डहरे नु ओन्टे अलखड़ा बीसुस खक्खरस, पँहेस आस गुसन हूँ अलखड़ा मल खक्खरा – एन्देरेगे का आस गही अलखड़ा मल चुंजुरआ लगिया। अन्तिले करमस असते की मुन्धभारे काःला हेल्लरस। जोक्क गेच्छा केरका खोःखा डहरे नु ओरोत दुदही बीसुस खक्खरस, मुन्दा असन हूँ दुदही मल खक्खरा – एन्देरेगे का दुदही बीसुस गही ओये ही दुदही दिम खईया केरा। अन्तिले करमस असते की मुन्धभारे काःला हेल्लरस। जोक्क गेच्छा केरका खोःखा डहरे नु ओण्टे बेःल बखड़े ता बेःलस रोःगे ती लिटलिटा मंज्जका रहचस। आस गने कत्था मंज्जा खने आ रोःगे साःर’उस, बाःचस – नीन करम देवन खक्खोय होले एंगहय दुक्खेन हूँ मेनके। ई लेखे करमस कूल कीड़ा साःरनुम असते की काःला हेल्लरस। कालनुम–कालनुम आस ओन्टा कौंहा ले बियारखो हेददे अँडिसयस। आ बियारखो मझी, ओन्टा करम मन्न एत्थरा पँहेस असन अँडसना अकय मसकिल रहचा। असन आस कूल–कीःड़ा साःरनुम मून्द उल्ला–माःखा रईह केरस, पँहेस आस गे एन्दरा हूँ उपई–पतर मल खक्खरा। आ बारीम बियारखो कूटी नु ओन्टा गोःदो बरचा अरा करमासिन मंज्जा। आद आःसिन मून्द उल्ला ती जोंःहआ लगिया। अन्तिले अदि गे हूँ मल सहारा खने हेददे बरअर बाःचा – नीन इसन नेःकन बेददा लगदय। गोःदो गही कत्थन मेनर करमस बाःचस – करम देःवन बेददा गे उरूखका रअदन। खने गोःदो बाःचा – करम देःवन खक्खोय होले एंगहय दुक्खेन हूँ मेनके। एःन कूल नुंजना ती दव कुना ओःगा हूँ पोल्लेन। एन्ने बअर गोःदो करमासिन घोड़ो अरगाचा की आ बियारखो मझी ता करम मन्न हेददे अँडसताचा चिच्चा दरा बाःचा आ करम मन्न हेददे एःन अँडसा पोलदन। नीन असन कालके दरा एमहय बेयानन अखके दरा बरके।

अन्तिले करमस मन्न गुसन अँडसर की एःरदस का आ अनथन दव पचगिस मन्न गही मूली नु उक्का रअदस। आसीन एःरर करमस बुज्जरस केरस अरा करम देव गही खेड्ड नु खत्तरस की गोहरारआ हेल्लरस। करमस गही गोहरारना अरा ओहरा बिनती नन्नन एःरर देव पचगिस बाचस – “चोआ बबु, अक्कु निंगहय दुक्खे बोंगो अरा करम कपड़े किर्रो। “एन्ने दोवा खक्खर करमस चोःचस दरा आ देव पचगिसिन ओ’लगियस। अदि खोःखा डहरे ता उरमी कत्थन तरकूटी ती तिंंगयस अरा अदिन बुझाबआ गे बाःचस। करमस गही कत्थन मेनर पचगी रूपे नु करम देव उरमी कत्था गही बेयानन तिंंगया अरा बाःचा – एंगहय मून्द गोटंग डाःडन होआ दरा कला। आदिम निंगहय डहरेन पंगे ननो। एन्ने बअर आ देव पचगिस असते की छन्द मंज्जस केरस। अन्तिले करम देव ही दोवा खक्खर करमस नेमहाँ मनर बड़ियर मंज्जस केरस। अदी खोःखा आस मून्द गोटंग करम डाःडन ओन्दिम रज्जा नु खण्डर की धरचस की एड़पा कीर्ता हेल्लरस।

किर्रो बारी उरमी ती मून्ध, गोःदो खक्खरा अरा करमासिन एःरर मेंज्जा। खने करमस बाःचस – “नीन धरमेस गही ओहमा पाःडूरिन ननअम ठकदी की मूखदी अवंगे धरमेस निंगगा दाँड़े चिच्चका रअदस। अक्कु नीन करम देःवन सुमरारअय अरा गछरअय का इन्ना ती नीन अन्ने मल ननोय। गोःदो करम देःवन ओःलगिया अरा गच्छरा का आद धरमी आलारिन मल साःधओ।” कत्थन मेनर करमस, करम डाःडन गोःदो गने ओःसोरताचस चिच्चस। करम डाःडा गही गोःदो मईयां ओःसोरनुम गोःदो कोड़े मंज्जा केरा अरा दव कुना ओःगनुम करमा सिन तरकूटी अँडसताचा चिच्चा। तरकूटी अँडसर करमस बाःचस – नीन धरमेस ही नाःमे ती पुजा ननु ओण्टे सोना–रूपा अइत्तका आःलिन नीन मुक्की रअदी अउलातिम निंगहय कूल नुंज’ई, एन्देर गे का अबड़ा सोना–रूपा निंगहय कूल नुम रअई। एका गूटी अबड़न नीन कूल ती बहरी मल ओथोरओय आ गूटी निंगहय कूल नुंजना मल मेटेरओ। करमस ही कत्थन मेनर गोःदो बाःचा – अना भईयो, से एंगहय दुक्खेन गा तिंङकय, अक्कु एंगहय दुक्खेन हूं नीन लेले होआ, बअर आद उरमी सेना–रूपन कूल ती बहरी ओत्थरा दरा करमस गे ची लघचा। करमस गोःदो गुसता सोना–रूपन धरचस दरा किर्रा हेल्लरस। डहरे नु रोःगे ती लिटलिटा मंज्जका बेःलस खक्खरस। आस मेंज्जस – “एन्देर गे एंगगन एन्ने रोःगे मंज्जा। “खने करमस बाःचस – “नीन निंगहय राःजीन दव कुना मल चलाबअदय अरा पहटा ता नन्ना–नन्ना मुक्कर गने रअदय। अवंगे धरमे सवंग निंगगन दाँड़े चिच्चा। “अक्कु करम देःवन ओलगगा अरा गछरआ का इन्ना ती अन्ने मल ननोय। रोगाहा बेःलस करम देवन ओःसरस की ओःलगियस अरा गच्छरस का अक्कु नन्ना–नन्ना आःलीर गने मल रओस दरा राःजिन दव कुना चलाबओस। अन्ने गछरका खोःखा आस कोड़े मंज्जस केरस अरा तंगहय बखड़े चला केरस। अन्तिले डहरे नु दुदही बीसुस खक्खरस। आस करमा सिन मेंज्जस का – “आस गही ओये दुदही एन्देर गे मल चि’ई ? खने करमस तिंङयस – “नीन धरमे सवंगन पुजा ननुर गे दुदही रअनु हूं दुदही मल चिअदय अरा आःरिन ठकदय अवंगे धरमे सवंग निंगगन दाँड़े चिच्चा।” नीन करम देवन ओलगगा अरा गछरआ का अक्कु अन्ने मल ननोय। दुदही बीसुस नेवखरस की करम देवन ओःलगियस अरा गच्छरस का अक्कु आस मलकोड़े नलख मल ननोस। अदी खोःखा करमस, करम देःवन ओये नु ओःसोरताःचस चिच्चस। करम गने ओःसोरनुम ओये कोड़े मंज्जा केरा अरा दुदही चिआ हेल्लरा, खने करमस उच्छ तिंघआ दुधी ओण्डस की एडपा किर्रा हेल्लरस। डहरे नु आ अलखड़ा बीसुस खक्खरस। आस मेंज्जस – “एन्देर गे एंगहय अलखड़ा मल चुंज्जुर’ई। “खने करमस बाःचस – “नीनु धरमे ही नामे ती उबस’ऊ आलारिन पडगदय अवंगे धरमे सवंग निंगगन दाँड़े चिच्चा। “अक्कु करम देःवन ओलगगा अरा गछरआ का इन्ना ती अन्ने मल ननोय। अलखड़ा बीसुस करम देवन ओःसरस की ओःलगियस अरा गच्छरस का अक्कु धरमे ही नामे ती उबस’ऊ आलारिन मल पडगोस। अन्ने नंज्जका खोःखा आस गही अलखड़ा चुंज्जरआ हेल्लरा तसले करमस उडुच लिंघआ मोक्खस की एडपा किर्रा हेल्लरस। जोक्क गेच्छा डहरे केरका खोःखा आ पलखंज्जा इद’उस खक्खरस। पलखंज्जा इद’उस मेंज्जस – “एन्देरगे एंगहय पलखंज्जा पोका मनी। खने करमस बाःचस – नीन धरमे सवंगन सार’ऊर अरा कूल–कीःडर गे पलखंज्जा रअनु हूं मल चिअदय, अवंगे निंगहय पलखंज्जा पोका मनी। अक्कु नीन गछरआ का नीन अक्कु अन्ने मल ननोय। अन्तिले पलखंज्जा इदउस गच्छरस का आस अक्कु अन्ने मल ननोस। अन्ने कत्थन मेनर करमस करम डाःडन पलखंज्जा इदउस अरा पलखंज्जा खोप्पा मईयां ओःसोरताःचस चिच्चस, खने उरमी पलखंज्जा कोड़े मंज्जा केरा। अन्तिले करमस उडुच लिंघआ पलखंज्जा मोःखर असते की मुन्दभारे काःला हेल्लरस। काःनुम–काःनुम डहरे नु आ पोखारी खक्खरा। करमस पोखारी गुसन अँडिसयस खने पोखारी मेंज्जा – एंगहय अम्म एन्देर गे खेंःसो मनी। खने करमस बाःचस – नीन धरमे सवंग गही तिंङका लेखआ मल ननदी अरा अम्म ओनका रिन हूं ओना मल चिअदी अरा तंगआ पईकर गने एलेगताअदी, अवंगे धरमे सवंग निंगगा दाँड़े चिच्चा। अक्कु नीन करम देवन ओलगगय अरा गोहरारअय का इन्ना ती नीन अन्ने मल ननोय। पोखारी अन्नेम गच्छरा का आद अक्कु नेःकन हूं मल एलेगतोओ। एन्ने गछरका खोःखा करमस करम देवन अम्म नु ओःसोरताचस चिच्चस। करमदेव गही ओःसोरतेम पोखारी ता अम्म निरंग मंज्जा केरा। तसले करमस हिंछा पूरती अम्म ओण्डस। अन्तिले मुंज्जा नु डोम्बारी मन्न खक्खरा। डोम्बारी बाःचा – “एंगहय खंजपा एन्देर गे पोचगो मनी।” खने

करमस बाःचस – निंगहय मूली नु ढेर बग्गे खलब ढिबा रई। एका गूटी आद चडरअर की मलका आलर गे मलता कीड़ा साःर'उर गे मल खट्टरतारओ आ गूटी निंगहय दुक्खे मल बोंगो। कत्थन मेनर डुम्बारी बाःचा – “अना भईय्यो, ई नलखन गा नीनिम नना ओंगोय, से अवन्दा गूटी करम देवन एंगहय मईय्यां उईया चिआ। अन्तिले करमस अन्नेम नंज्जस। करमदेव गही डोम्बारी गने ओंसोरतेम उरमी पोचगो डुम्बारी कोड़े मंज्जा केरा। संगे-संगेम करमस डुम्बारी मूली गुसन गड्डका गगरा ढिबन चड्डस चिच्चस अरा अदी खोःखा आ डुम्बारिन उडुच लिंघा मोक्खस दरा गगरा ढिबन खट्टनुम-खट्टनुम तंगआ एडपा किर्यस।

ई लेखे करमस करम देःवन होच्चस की एका उल्ला एडपा अँडिसयस, अऊलम पुरखा परिया ती बरनुम बरचका करम परब उल्ला रहचा। एडपा अँडिसका खोःखा एडपा ता ओरमा भईया-बहीन अरा खद्द-खरर जुम्मर, चाःली-बखड़े नु करम गडचर दरा मईन सिरे पुजा-धजा नंज्जर। पुजा- धजा नंज्जका खोःखा मुसुरकुट चेंप पोस्सा। अन्तिले नन्ना उल्ला निन्दका खाड़ नु करम देःवन बोहाबाःचर चिच्चर। बअनर अउला तिम केरमे-केरमे राःजी किरा हेल्लरा, रोग-बलय कोड़े मना हेल्लरा। आःलर धरमे अरा धरमी सवंगन ओहमा पाःड़ा हेल्लर।

बअनर – करम देःव गही मया ओरमर गे खक्खरा केन्धेल। करम परब कट्टिका खोःखम जऊनी गही बेंज्जा नेःग धरआ अँडिसयर। अन्तिले ओण्टा सुघड़ ले जोःखस गने बेंज्जा मंज्जा अरा आर गही खद्द-खरर कोड़े-कोड़ेम उज्जयर-बिज्जयर। अबड़ा पुरखर गही नंज्जका तिगका लेखेम ई नेला हूँ ननतार'ई अरा करम परब मनाबातारनुम बरतारआ लगी।

बअनर – एका उल्ला करमस करम देःवन ओन्दरस की पद्दा किर्यस अउला भादो चन्ददो ही बिल्ली पक्खे ता दोयओन्दता उल्ला रहचा। अन्तिले ओरमर पद्दा-खेप्पा नू दःव कुना करमा- धरमा गर हूँ तमहँय उज्जना गूटी पद्दा-खेप्पा, एडपा-पल्ली नु दव कुना करम मनाबअनुम केरर अरा दव ले उज्जयर-बिज्जयर। अक्कुन हूँ एका ओरतर मइन सिरे करम देव गही सेवा-सुसर नननर, आर गही करम-कपड़े कोड़े मनी, एन्देर गे का करम देव गही रूपे नु धरमे सवंग गही दिम पूजा-धजा मनी, संगे-संगेम भईया-बहीन मझी नु लोल्ला अरा मईनता मेच्छा परदी।

बेड़ा कट्टिका ती, करमस एका लेखे पद्दा-पद्दा, कुद्दा-कुद्दा करम देव गही महबा तेंग्गा हेल्लरस का करम देव गही दोवा ती ससईत दुक्ख-दन्द बोंग्गा अरा एका पद्दा नु एकासे ससईत खक्खरा अरा एका बेसे ससईत ती नेब्बा मंज्जा आ बेसेम पद्दा गइनका जुदा-जुदा उल्ला करम गडतारआ हेल्लरा अरा अक्कुन गूटी अन्नेम गडतारनुम बरआ लगी।

हेभेरना – सवाल :-

1. कुँडुख बेःलस गे एन्देर दुक्खे मना लगिया ?
2. करमा-धरमा बगर एवन्दा भईयो रहचर ?
3. जवा पुँप एका बेसे बरचा ?
4. करमस गने डहरे नु ने भेंट मंज्जा अरा आर गही दुक्खे एका से बोंग्गा ?
5. गोःदो अरा करमस मझी ता कत्थन दव कुना तेंग्गा ?
6. ई खीरीन खोंड'उ ने तली ?

खोःजू :

डॉ० नारायण उराँव

सय गजेन्द्र उराँव,

पद्दा : सैन्दा, थाना : सिसई,

जिला : गुमला (झारखण्ड), पिन : 835324